



Հայաստանի Հանրապետության փաստաբանների պալատի խորհրդի
05 մայիսի 2015թ
ՈՐՈՇՈՒՄ թիվ ԿԳ/69-Ա

Փաստաբաններ Արամազդ Կիվիրյանին (արտոնագիր թիվ 800) և Դիանա Գրիգորյանին (արտոնագիր թիվ 717) կարգապահական պատասխանատվության ենթարկելու հարցը քննարկելու մասին

Հայաստանի Հանրապետության փաստաբանների պալատի (այսուհետ՝ նաև Պալատ) խորհուրդը՝ նիստը նախագահող Սիմոն Բաբայանի, անդամներ՝ Մելանյա Առուստամյանի, Տիգրան Խուրշուդյանին, Մարտուն Փանոսյանի, Կարեն Սարգսյանի, Կարապետ Աղաջանյանի, Լիպարիտ Սիմոնյանի և Նելլի Հարությունյանի կազմով, քարտուղարությամբ Պալատի կարգապահական գործերը համակարգող՝ Նոնա Համբարձումյանի,

քննության առնելով փաստաբաններ՝ Արամազդ Կիվիրյանին (արտոնագիր թիվ 800) և Դիանա Գրիգորյանին (արտոնագիր թիվ 717) կարգապահական պատասխանատվության ենթարկելու հարցը,

Պ Ա Ր Ձ Ե Ց

1. Կարգապահական վարույթ հարուցելու առիթը և հիմքը

14.08.2014թ. Արմեն Ներսիսյանը (այսուհետ նաև՝ Դիմող կամ Դիմումատու) դիմում է ներկայացրել ՀՀ փաստաբանների պալատ՝ խնդրելով փաստաբաններ Արամազդ Կիվիրյանի և Դիանա Գրիգորյանին (այսուհետ նաև՝ Պատասխանողներ) ենթարկել կարգապահական պատասխանատվության: Դիմումատուն հայտնել է, որ իր իրավունքները դատարանում պաշտպանելու համար դիմել է փաստաբաններ Արամազդ Կիվիրյանին և Դիանա Գրիգորյանին, որոնք իրեն պատշաճ իրավական օգնություն ցույց չեն տվել այն է՝

- բարեխիղճ իրավական օգնություն ցույց չեն տվել և չեն ապահովել հանձնարարության բարեխիղճ և ժամանակին կատարումը.
- փաստաբաններ Արամազդ Կիվիրյանը և Դիանա Գրիգորյանը Դիմողին վճարովի հիմունքներով իրավական օգնություն են ցույց տվել, սակայն փաստաբանական ծառայությունների մատուցման պայմանագիր չեն կնքել.
- փաստաբաններ Արամազդ Կիվիրյանը և Դիանա Գրիգորյանը Դիմողին ամբողջապես չեն բացահայտել փաստաբանի հոնորարի չափը.
- փաստաբաններ Արամազդ Կիվիրյանը և Դիանա Գրիգորյանը խուսափում են Դիմողի հեռախոսազանգերին պատասխանելուց:

2. Կարգապահական վարույթ հարուցելու մասին որոշումը.

09.09.2014թ. ՀՀ փաստաբանների պալատի նախագահի թիվ 320-Ա/ԿԳ-14114 որոշմամբ փաստաբան Արամազդ Կիվիրյանի և Դիանա Գրիգորյանին նկատմամբ ՀՀ

փաստաբանների պալատի ընդհանուր ժողովի կողմից 11.02.2012թ. թիվ 1/4-Լ որոշմամբ հաստատված Փաստաբանի վարքագծի կանոնագրքի (այսուհետ՝ **Կանոնագիրք**) 2.7.2, 3.3.1, 3.5.5 և 3.6.1 ենթակետերի պահանջների խախտման հատկանիշներով հարուցվել է կարգապահական վարույթ և դիմող է ճանաչվել Արմեն Ներսեսյանը:

16.09.2014թ. կարգապահական գործը հանձնվել է նախապատրաստող անձ Հարություն Հարությունյանին:

3. Դիմողի և Պատասխանողի համառոտ բացատրությունները, վկաների ցուցմունքները.

3.1. Դիմողի համառոտ բացատրությունը.

Դիմող ՀՀ քաղաքացի Արմեն Ներսիսյանը դիմելով Պալատ հայտնել է, որ իրեն պատկանող ավտոտնակի և հողակտորի սեփականության գրանցման համար անընդհատ գտնվում է կադաստրի հետ տարածայնությունների մեջ: Իր իրավունքը վերականգնելու համար դիմել է դատարան: Դատական ատյաններում իր շահերը պաշտպանելու համար դիմել է «Արես» փաստաբանական գրասենյակի փաստաբաններ՝ Դիանա Գրիգորյանին և Արամազդ Կիվիրյանին: Դիմումատուն նշել է, որ այդ փաստաբաններին նա չի ճանաչել, նրանց երաշխավորել է իր աշխատակիցը՝ որպես խելացի և պատրաստված երիտասարդների: Մինչև փաստաբաններին դիմելը վարչական դատարանում իր շահերը ներկայացրել է փաստաբան Ժորա Հարությունյանը:

Դիմողն իր բացատրությունում նշում է, որ գործընթացը սկսելու համար 2013թ. լիազորագիր է տվել Դիանա Գրիգորյանին և Արամազդ Կիվիրյանին և ծառայություններ մատուցելու համար իրենց պահանջով 500 000 հազար գումար առձեռն առանց պայմանագիր կնքելու և բանկում համապատասխան վճարումներ կատարելու հանձնել է Արամազդ Կիվիրյանին: Այս երկու երիտասարդ փաստաբանների վարքագիծը Դիմումատուն համարել է տարօրինակ: Սակայն դատական գործընթացը առավել արագ և խելամիտ ներկայացնելու համար վերջինս համաձայնվել է, հուսալով որ մնացած բոլոր իրավական հարցերը ու խնդիրները նրանց կողմից կլուծեն: Դիմումատուն նշում է, որ հակառակ իր սպասումների և ակնկալիքների գործը ավելի ձգձգվեց, բարդացվեց, մտցրվեց փակուղի և դեռ ավելին յուրաքանչյուր նախադասություն կազմելու համար երիտասարդ փաստաբանները պահանջել են հավելյալ գումարներ:

Այժմ գործը գտնվում է դատական վարույթում, սակայն Արամազդ Կիվիրյանը և Դիանա Գրիգորյանը հրաժարվում են գործընթացը շարունակելուց՝ պատճառաբանելով, որ անցած դատական նիստից դեռևս 300 000 հազար Դիմումատուն պարտք է մնացել, իսկ ներկա նիստին իրենց ներկայությունը ապահովելու համար Դիմումատուն պետք է ավելացնի ևս 200 000 հազար դրամ: Ըստ Դիմումատուի Պատասխանողներին նման անհարգալից վերաբերմունքը, հեռախոսազանգերի է, պատասխանելուց խուսափելը, նրան ստիպում է հրաժարվել ծառայություններից և պահանջել ետ վերադարձնել 500 000 հազար վճարված

գումարը և փաստաթղթերի բնօրինակները: Դիմումատուի պնդմամբ Պատասխանողները խուսափում են և ոչինչ չեն ցանկանում վերադարձնել:

Ի լրումն նշվածի 03.10.2014թ. Դիմողի կողմից Պալատ է մուտքագրվել ևս մի գրություն, որտեղ վերջինս նշել, որ պահանջում է ետ վերադարձնել գումարը, իսկ նրանք բնականաբար հրաժարվել են պատճառաբանելով, որ իրենք անվճար են ծառայություն մատուցել և դադարեցրել են իրենց գործունեությունը, քանի որ կատարված աշխատանքի դիմաց համապատասխան փոխհատուցում չեն ստացել:

3.2. Պատասխանողի համառոտ բացատրությունը

Նախապատրաստողի կողմից 27.10.2014 թվականին Պատասխանողները հրավիրվել են անհրաժեշտ բացատրություններ ներկայացնելու, սակայն նրանցից ոչ մեկը չի ներկայացել: Վերջիններս ծանուցվել են նաև սույն կարգապահական գործի քննության շրջանակներում հրավիրված Խորհրդի նիստերին, սակայն նույնպես չեն ներկայացել:

3.3. Վկաների ցուցմունքները.

Սույն կարգապահական գործով վկաներ չեն հրավիրվել:

4. Կարգապահական գործը նախապատրաստողի եզրակացությունը, եզրակացության վերաբերյալ առարկությունները և գործի հանձնումը Խորհրդին.

Պալատի կարգապահական գործը նախապատրաստող անձի կողմից 17.11.2014թ. կազմված եզրակացության համաձայն՝ նախապատրաստող անձը գտել է, որ Պատասխանողների կողմից կատարված արարքը չի բավարարում Փաստաբանի վարքագծի կանոնագրքի 2.7.2, 3.5.5, 3.3.1 և 3.6.1 խախտման հատկանիշներով սահմանված արարքի հատկանիշներին: Նախապատրաստողը հաստատված է համարել Պատասխանողների և դիմումատուի միջև իրավաբանական օգնություն տրամադրելու փոխհարաբերությունների առկայության փաստը:

24.11.2014թ. սույն կարգապահական գործը հանձնվել է Պալատի խորհրդին:

Խորհրդի նիստերը տեղի են ունեցել 04.03.2015թ., 27.03.2015թ., 20.04.2015թ. և 06.05.2015թ. ՀՀ փաստաբանների պալատի վարչական շենքում (ք.Երևան, Զաքիյան 2, 4-րդ հարկ, թիվ 12 սենյակ):

5. Գործի հանգամանքները՝ առկա ապացույցների վկայակոչմամբ

Կանոնագրքի հավելվածը հանդիսացող Փաստաբանի նկատմամբ կարգապահական վարույթի իրականացման կարգի (այսուհետ՝ Վարույթի կարգ) 22-րդ հոդվածի 3-րդ մասի համաձայն՝ Պալատի խորհուրդը հիմք է ընդունում Նախապատրաստողի եզրակացությամբ հաստատված փաստերը, բացառությամբ այն դեպքի, երբ գործում գտնվող ապացույցները կամ Պալատի խորհրդին

ներկայացված լրացուցիչ ապացույցները՝ սույն կարգին համապատասխան գնահատելու արդյունքում Պալատի խորհուրդն այլ եզրահանգման է գալիս:

Պալատի խորհուրդը ուսումնասիրելով գործում առկա ապացույցները, հաշվի առնելով նաև Կարգապահական գործը նախապատրաստողի եզրակացությունը, հաստատված է համարում հետևյալ փաստերը՝

1. 26.04.2013թ-ից մինչև 24.09.2014թ-ը ընկած ժամանակահատվածում փաստաբաններ՝ Արամազդ Կիվիրյանը և Դիանա Գրիգորյանը ԵԿԴ/0990/02/13 քաղաքացիական գործով հանդես են եկել, որպես Դիմումատուի փաստաբաններ՝ ներկայացուցիչներ¹: Մասնավորապես՝

- 26.04.2013թ. փաստաբաններ Արամազդ Կիվիրյանը և Դիանա Գրիգորյանը Դիմումատուի անունից դատարան ներկայացրել են դիմում՝ Երևան քաղաքի Պուշկին 8/2 հասցեում գտնվող 17.3 քմ մակերեսով հողատարածքի և Երևան քաղաքի Պուշկին 8/3 հասցեում գտնվող 15.1 քմ. մակերեսով հողատարածքի նկատմամբ՝ սեփականության իրավունքով Արմեն Ներսեսյանի տիրապետման փաստը ճանաչելու և Երևան քաղաքի Պուշկին 8 հասցեում գտնվող Արմեն Ներսեսյանի կողմից սեփականության իրավունքով օգտագործվող 63.36 քմ. հողատարածքի, Երևան քաղաքի Պուշկին 8/2 հասցեում գտնվող 17.3 քմ մակերեսով հողատարածքի և Երևան քաղաքի Պուշկին 8/3 հասցեում գտնվող 15.1 քմ մակերեսով հողատարածքի նկատմամբ դիմող Արմեն Ներսեսյանի սեփականության իրավունքը ճանաչելու պահանջների մասին.
- Երևան քաղաքի Կենտրոն և Նորք-Մարաշ վարչական շրջանների ընդհանուր իրավասության դատարանի 09.10.2013 թվականի որոշմամբ դիմումը թողնվել է առանց քննության:
- ՀՀ վերաքննիչ քաղաքացիական դատարանի 23.12.2013թ. որոշմամբ վերացվել է Երևան քաղաքի Կենտրոն և Նորք-Մարաշ վարչական շրջանների ընդհանուր իրավասության դատարանի 09.10.2013 թվականի որոշումը և գործը ուղարկվեց նոր քննության:
- Երևան քաղաքի Կենտրոն և Նորք-Մարաշ վարչական շրջանների ընդհանուր իրավասության դատարանի 30.06.2014 թվականի որոշմամբ կրկին անգամ հայցը թողնվել է առանց քննության:
- ՀՀ վերաքննիչ քաղաքացիական դատարանի 02.10.2014թ. որոշմամբ կրկին անգամ դատական ակտը բեկանվել է գործն ուղարկվել նույն դատարան:

Պատասխանողների կողմից դիմումատուին իրավաբանական օգնություն տրամադրելու և նրանց միջի փաստաբան-վստահորդ փոխհարաբերությունների առաջացման փաստը Պալատի խորհուրդը հաստատած է համարել հիմք ընդունելով դիմումատուի բացատրությունները, www.datalex.am տեղեկատվական համակարգից ստացված նյութերը:

2. Դիմումատուի և Պատասխանողների միջև իրավաբանական օգնություն տրամադրելու վերաբերյալ պայմանագիր չի կնքվել:

¹ Տե՛ս՝ http://datalex.am/dl_case_view_page.php?caseType=2&courtID=0&caseID=14355223812297271

Որևէ իրավաբանական փաստի բացակայությունն այդպիսին համարելու համար, Պալատի խորհուրդը բավարար է համարում բացակայությունը վկայակոչողի պնդումը, քանի դեռ հակառակը չի ապացուցվել: Պալատի խորհուրդը գտնում է, որ փաստի բացակայությունն այլ կերպ հնարավոր չէ ապացուցել և այն պնդող անձը չի կարող ողջամիտ ջանքեր գործադրելով ապացուցել, որ այդ իրադարձությունը տեղի չի ունեցել:

Տվյալ դեպքում, կարգապահական վարույթի որևէ կողմ չի ներկայացրել իրավաբանական օգնություն տրամադրելու վերաբերյալ պայմանագիր, հետևաբար Պալատի խորհուրդը գտնում է, որ այդպիսի պայմանագիր չի կնքվել:

Պալատի խորհուրդն այս փաստի հետ կապված արձանագրում է, որ ՀՀ փաստաբանների պալատի նախագահի 09.09.2014թ. թիվ 320-Ա/ԿԳ-14114 որոշմամբ իրավացիորեն այս խախտման համար կարգապահական վարույթ չի հարուցվել՝ վաղեմության ժամկետն անցած լինելու պատճառաբանությամբ:

3. Փաստաբաններ Արամազդ Կիվիրյանը և Դիանա Գրիգորյանը հրաժարվել են Դիմողին բարեխիղճ իրավական օգնություն ցույց տալ:

Փաստաբանների կողմից իրավաբանական օգնություն ցույց տալուց հրաժարվելու փաստն ապացուցված է համարվում, քանի որ՝

- այդպիսի պնդմամբ հանդես է եկել Դիմումատուն,
- Պատասխանողները հակառակը չեն ապացուցել, մինչդեռ Պալատի կողմից այդպիսի հնարավորություն նրանց տրվել է՝ նախապատրաստողի կողմից 30.10.2014 թվականին, իսկ Պալատի խորհրդի կողմից՝ 04.03.2015թ., 27.03.2015թ., 20.04.2015թ. և 06.05.2015թ. Պատասխանողները հրավիրվել են անհրաժեշտ բացատրություններ ներկայացնելու, սակայն նրանցից ոչ մեկը չի ներկայացել և չի տվել որևէ բացատրություն:

6. Պատասխանողների անձը բնութագրող հանգամանքները

Պատասխանողներ՝ Դիանա Գրիգորյանը (արտոնագիր թիվ 717) և Արամազդ Կիվիրյանը (արտոնագիր թիվ 800) 2007-2015թթ ընկած ժամանակահատվածում կարգապահական պատասխանատվության չեն ենթարկվել:

7. Պալատի խորհրդի պատճառաբանված եզրակացությունը և որոշումը

Հիմք ընդունելով Պալատի խորհրդի կողմից հաստատված փաստերը, դրանք հիմնավորող գործում առկա ապացույցները և քննարկվող իրավահարաբերությունները կարգավորող կանոնները, Պալատի խորհուրդը գտնում է, որ փաստաբան Արամազդ Կիվիրյանին և Դիանա Գրիգորյանին պետք է ենթարկել կարգապահական պատասխանատվության, հետևյալ պատճառաբանությամբ.

7.1. Բարեխիղճ իրավական օգնություն ցույց տալուց հրաժարվելու կապակցությամբ.

Կանոնագրքի 2.7.2 ենթակետի համաձայն՝ փաստաբանը պարտավոր է վստահորդին բարեխիղճ իրավական օգնություն ցույց տալ իր մասնագիտական կարողությունների սահմաններում, ինչը ենթադրում է իրավունքի համապատասխան ճյուղի իմացություն, վստահորդի հանձնարարությանը վերաբերող բոլոր հանգամանքների ուսումնասիրություն, հանձնարարության պատշաճ կատարման համար անհրաժեշտ գործողությունների կատարում:

Կանոնագրքի 3.5.5 ենթակետի համաձայն՝ Փաստաբանը պարտավոր է ժամանակին, գիտակցաբար և ջանասիրաբար խորհուրդ տալ և պաշտպանել իր վստահորդին և հանդես գալ նրա անունից:

Վերլուծելով նշված կանոնները Պալատի խորհուրդը գտնում է, որ սույն գործի փաստերի լույսի ներքո անհրաժեշտ է դրանք դիտարկել համակցության մեջ:

Այսպես՝ Կանոնագրքի 2.7.2. ենթակետով փաստաբանի վրա դրվում է պարտականություն՝

- վստահորդին բարեխիղճ իրավական օգնություն ցույց տալու,
- իրավունքի համապատասխան ճյուղի իմացության,
- վստահորդի հանձնարարությանը վերաբերող բոլոր հանգամանքների ուսումնասիրություն կատարելու,
- **հանձնարարության պատշաճ կատարման համար անհրաժեշտ գործողությունների կատարելու:**

Միաժամանակ Կանոնագրքի 3.5.5 ենթակետը նույնպես փաստաբանին մղում է ակտիվ գործունեության նշելով փաստաբանի ջանասիրությունը, ժամանակին տրվող խորհուրդները և վստահորդի անունից հանդես գալու պարտականությունը:

Համադրելով Կանոնագրքի նշված ենթակետերը Պալատի խորհուրդը, գտնում է, որ դրանք համակցությամբ մեկնաբանելիս բացահայտվում է փաստաբանի գործունեության բարեխիղճության, և հանձնարարության պատշաճ և լրիվ կատարման իրավական բովանդակությունը:

Տվյալ դեպքում, պատասխանողները պարտավոր էին հանձնարարության պատշաճ կատարման համար անհրաժեշտ գործողություններ կատարել, ինչպես նաև վստահորդի անունից հանդես գալ, ինչը սակայն չեն կատարել:

Կանոնագրքով իրավաբանական օգնություն տրամադրելուց հրաժարվելու հիմքերը հստակ նշված են և Պատասխանողներն առնվազն պետք է այդպիսի փաստեր վկայակոչեին և Վարույթի կարգի 15-րդ հոդվածի առաջին մասի համաձայն ապացուցեին:

Վերոգրյալը նկատի ունենալով Պալատի խորհուրդն արձանագրում է, որ փաստաբաններ Արամազդ Կիվիրյանի և Դիանա Գրիգորյանի վարքագիծը հակասում է Կանոնագրքի 2.7.2 և 3.5.5 ենթակետերով նախատեսված կանոններին:

7.2. Փաստաբանի հոնորարի չափը ամբողջապես չբացահայտելու կապակցությամբ.

Կանոնագրքի 3.3.1 ենթակետով սահմանված կանոնի համաձայն՝ վարձատրությունը (հոնորարը), որը փաստաբանական գրասենյակը ստանում է, պետք է ամբողջապես բացահայտվի վստահորդին: Հոնորարի չափի և վճարման կարգի շուրջ համաձայնության են գալիս կողմերը՝ իրենց հայեցողությամբ: Հոնորարի չափի մեջ չի ներառում փաստաբանի կատարած այլ ծախսերը, որոնք անհրաժեշտ են հանձնարարության կատարման համար (մասնավորապես՝ տրանսպորտային, թարգմանչական կամ մասնագետներին հրավիրելու, տպագրության, պատճենահանման, փոստային և նոտարական ծախսերը, ինչպես նաև այլ դատական ծախսերը), եթե կողմերի համաձայնությամբ այլ բան չի նախատեսվել:

Պալատի խորհուրդն արձանագրում է, որ կողմերի միջև պայմանագիր չի կնքվել, իսկ հետագայում էլ դատական աստիճանների փուլերում կամ որևէ դատավարական գործողություն կատարելու համար վստահորդից գումար պահանջելու և ստանալու փաստերը Վարույթի կարգի 15-րդ հոդվածի 1-ին մասի համաձայն, պետք է ապացուցեր դիմումատուն: Պալատի խորհուրդ միայն դիմումատուի բացատրությունը բավարար ապացույց չի համարում այդ փաստերը հաստատված համարելու համար:

«Փաստաբանության մասին» ՀՀ օրենքի 39.7-րդ հոդվածի 6-րդ մասի համաձայն՝ կարգապահական խախտման փաստը ապացուցված լինելու վերաբերյալ բոլոր կասկածները, որոնք չեն կարող փարատվել սույն օրենքի և վարքագծի կանոնագրքի դրույթներին համապատասխան պատշաճ իրավական ընթացակարգի շրջանակում, մեկնաբանվում են հօգուտ փաստաբանի:

Տվյալ դեպքում, այս նորմի կիրառմամբ, Պալատի խորհուրդը գտնում է, որ կարգապահական վարույթն այս մասով ենթակա է կարճման:

7.3. Դիմողի հեռախոսազանգերին պատասխանելուց խուսափելու կապակցությամբ.

Կանոնագրքի 3.6.1 ենթակետի համաձայն՝ փաստաբանը պարտավոր է կանոնավորապես տեղեկացնել վստահորդին հանձնարարության կատարման ընթացքի մասին և պատասխանել նրան հետաքրքրող հարցերին:

Սույն գործի քննության շրջանակներում Պալատի խորհրդին տրված բացատրություններում Դիմումատուն հայտնել է, որ ներկայացուցչություն իրականացնելիս, մինչև փաստաբանական ծառայություններից հրաժարվելը իր հեռախոսազանգերին Պատասխանողները պատասխանում էին և հայցվող տեղեկությունը հայտնել են նրան: Նշված բացատրությունից հետևում է, որ փաստաբաններ՝ Արամազդ Կիվիրյանը և Դիանա Գրիգորյանը չեն կատարել Կանոնագրքի 3.6.1 ենթակետի պահանջին հակասող արարք: Պալատի խորհուրդը Պատասխանողների կողմից իրավաբանական օգնություն տրամադրելուց հրաժարվելու վարքագծին արդեն վերը տվել է իրավական գնահատական, հետևաբար իրավաբանական օգնություն տրամադրելուց հրաժարվելուց հետո հեռախոսազանգերին չպատասխանելը չի կարող այս պայմաններում խախտում

համարվել:

Ուստի տվյալ իրավիճակում Պալատի խորհուրդը գտնում է, որ սույն մասով կարգապահական վարույթը ենթակա է կարճման:

«Փաստաբանության մասին» ՀՀ օրենքի 39.9 հոդվածի 2-րդ մասի համաձայն՝ կարգապահական տույժ կիրառելիս փաստաբանների պալատի խորհուրդը հաշվի է առնում նաև խախտման հետևանքները, փաստաբանի անձը, մեղքի աստիճանը, առկա տույժերը, փաստաբանին բնութագրող ուշադրության արժանի այլ հանգամանքներ:

Նույն հոդվածով նախատեսված են կարգապահական տույժերի հետևյալ տեսակները՝

- 1) նկատողություն.
- 2) խիստ նկատողություն.
- 3) մասնակցել լրացուցիչ վերապատրաստման դասընթացների.
- 4) տուգանք.
- 5) փաստաբանի արտոնագրի գործողության դադարեցում:

Պալատի խորհուրդը հաշվի առնելով նաև Պատասխանողների կողմից դիմումատուին անօգնական վիճակում թողնելու հետևանքը և Պատասխանողների կողմից կարգապահական տույժեր չունենալու հանգամանքը, գտնում է, որ Պատասխանողների նկատմամբ պետք է կիրառի խիստ նկատողություն տույժի տեսակը, ինչպես նաև լրացուցիչ վերապատրաստման դասընթացների մասնակցելը, որպես՝ լրացուցիչ տույժ:

Վերոգրյալը հիմք ընդունելով և ղեկավարվելով «Փաստաբանության մասին» ՀՀ օրենքի 10-րդ հոդվածի 5-րդ մասի 14-րդ կետի, 39-րդ հոդվածի, 39.7. հոդվածի, 39.8-րդ հոդվածի, 39.9. հոդվածի, ինչպես նաև ՀՀ փաստաբանների պալատի կանոնադրության 16.26-րդ կետի, Կանոնագրքի հավելվածը հանդիսացող «Փաստաբանի նկատմամբ կարգապահական վարույթի իրականացման կարգի» 30-րդ և 31-րդ հոդվածների պահանջներով,

Պալատի խորհուրդը՝

Ո Ր Ո Շ Ե Ց՝

1. Փաստաբաններ՝ Դիանա Գրիգորյանին (արտոնագիր թիվ 717) և Արամազդ Կիվիրյանին (արտոնագիր թիվ 800) ճանաչել մեղավոր Փաստաբանների պալատի ընդհանուր ժողովի կողմից 11.02.2012թ. հաստատված Փաստաբանի վարքագծի կանոնագրքի 2.7.2. և 3.5.5. ենթակետերի պահանջների խախտման համար:
- 1.1. Փաստաբաններ՝ Դիանա Գրիգորյանի (արտոնագիր թիվ 717) և Արամազդ Կիվիրյանի (արտոնագիր թիվ 800) նկատմամբ նշանակել տույժ՝ խիստ նկատողության ձևով:

- 1.2. Փաստաբաններ՝ Դիանա Գրիգորյանի (արտոնագիր թիվ 717) և Արամազդ Կիվիրյանի (արտոնագիր թիվ 800) նկատմամբ նշանակել լրացուցիչ տույժ՝ 8 (ութ) ակադեմիական ժամ ընդհանուր տևողությամբ՝ «Դեռնթոլոգիա» թեմայով, իրենց հաշվին լրացուցիչ վերապատրաստման դասընթացներին մասնակցելու պարտականության ձևով:
2. Փաստաբաններ՝ Դիանա Գրիգորյանի (արտոնագիր թիվ 717) և Արամազդ Կիվիրյանի (արտոնագիր թիվ 800) նկատմամբ Փաստաբանի վարքագծի կանոնագրքի 3.3.1. և 3.6.1 ենթակետերի պահանջների խախտման հատկանիշներով հարուցված կարգապահական վարույթը կարճել փաստաբաններին կարգապահական պատասխանատվության ենթարկելու հիմքի առկայությունը. հիմնավորված չլինելու պատճառով:
3. Հանձնարարել Պալատի աշխատակազմին՝ սույն որոշման մասին իրազեկել Դիմող՝ Արմեն Ներսիսյանին, փաստաբաններ՝ Դիանա Գրիգորյանին և Արամազդ Կիվիրյանին:

Ծանոթություն. *Սույն որոշումը կարող է բողոքարկվել դատական կարգով՝ այն ստանալու օրվանից մեկամսյա ժամկետում: Սույն որոշումն օրինական ուժի մեջ է մտնում սույն կետով նախատեսված բողոքարկման ժամկետն անցնելուց հետո:*

Հայաստանի Հանրապետության
փաստաբանների պալատի խորհրդի
նիստը նախագահող՝

Սիմոն Բարսյան